

AWIG AWIG
DESA PEKRAMAN KAWAN



KECAMATAN BANGLI - KABUPATEN BANGLI

2015

MURDHA CITTA

Om Awighnamastu nama siddham,

Malarapan saking asung kerta lugraha, Ida Sang Hyang Widhi Wasa ngawentenang kahuripan sekala niskala, ring Bhuwana Agung lan Bhuwana Alit. Manut dresta Desane wantah pawakan pasayuban Krama Desa rawuhing kula warga pawongannia. Desane keanggehang Bhuwana Agung, pawongannia soang-soang pinaka Bhuwana Alit.

Sotaning Bhuana Agung, Desane wantah pawakan Bhuwana maurip jangkep saha Tri Hita Karananya luire :

- ha. Parhyangan, sehananing kahyangan, penyiwian desa genah ngarcana Ida Hyang Parama Wisesa pinaka atma desane ;
- na. Pawongan, krama saha warga desa maka sami maka pawakan Tri Kaya, mawaning desane sida molah maprawerti;
- ca. Palemahan, tanah kakuwuban desa sinanggeh stula sariraning desane.

Adung patemoning bhuwana kalih, malarapan canta Jagadhita, sinanggeh murdhaning prayojana pang riptaning awig-awig Desa adat/Pakraman ring paseban mami krama desa adat.

Pinaka putusing paseban; wastu prasida, prayojanan mami kabeh prasama angidep muwah amagehaken kadi ling ing awig-awig iki.

PRATAMA SARGAH
ARAN LAN PAWIDANGAN DESA

Pawos 1

- (1) Desa Adat puniki mawasta Desa Pekraman Kawan
- (2) Jebar kakuwub wawidangannya mawates nyatur :
 - ha. Sisih wetan ring Desa Adat Tegaialang.
 - na. Sisih kulon ring Banjar Penatahan.
 - ca. Sisih lor ring Desa Adat Cempaga.
 - ra. Sisih kidul ring Desa Pekraman Bebalang.
- (3) Desa puniki kawangun antuk karang desa, carik ayah desa utawi gebogan krama, turmaning kepah dados 7 (pitung) Banjar, luire :
 - ha. Banjar Adat Kawan
 - na. Banjar Adat Blungbang
 - ca. Banjar Adat Pule
 - ra. Banjar Adat Geriya
 - ka. Banjar Adat Nyalian
 - da. Banjar Adat Puri Kanginan
 - ta. Banjar Adat Puri Dencarik

DWITYA SARGAH
PATITIS LAN PAMIKUKUH

Pawos 2

- Desa Pakraman Kawan ngamanggehang pamikukuh minakadi :
- ha. Pancasila;
 - na. Undang-Undang Dasar 1945;
 - ca. Tri Hita Karana manut sada cara Agama Hindu

Pawos 3

- Luwir patitis lan Sesanti Pakraman Kawan.
- ha. Mikukuhin miwah ngerajegang Sang Hyang Agama;
 - na. Nginggilang tata prawertine maagama.
 - ca. Ngerajegang kasukerta desa saha Pawongannia sekala lan niskala.

TRITIYA SARGAH
SUKERTA TATA PAKRAMAN

Palet 1

Indik Krama

Pawos 4

- (1) Sane kabaos Krama desa inggih punika kulawarga sane meagama Hindu saha ngemong karang Desa utawi carik ayah desa, siosan ring punika manut kahanan soang-soang Banjar;
- (2) Sajaba punika sinanggeh tamiyu.

Pawos 5

- Krama Desa Pakraman utawi Adat wenten 4 (petang) pawos luire :
- ha. Krama ngarep, kulawarga sane ngemong karang miwah carik, yadian balu utawi napuk.
 - na. Krama baleangkap kulawarga sane tan pekarang miwah carik sakewanten sampun mawiwaha.
 - ca. Krama roban
 - ra. Sane siyosan manut drasta

Pawos 6

- Kawit dados Krama Desa:
- ha. Sangkaning ngamong karang desa, carik utawi pecatu, utawi sangkaning pinunas;
 - na. mawiwit pawiwahan

Pawos 7

- Panemaya tedun mekrama Desa:
- ha. Manut dudonan saha mejalaran antuk tetegenan sadereng arep ring krama sane ngemongin karang ayahan desa
 - na. Mawiwit pawiwahan keni tetegenan manut paetang banjar soang- soang.

Pawos 8

- Sahanan krama Desa keni tetegenan (ayahan -ayahan) luire:
- ha. Ayahan nyumek mapiteges urunan miwah ayahan mamungkul majeng ring krama marep
 - na. Ayah bala angkep keni urunanya manut paetang banjar soang soang

ca. Ayah tapukan keni urunan mamungkul (nyumek), sejawanin petindak luput

Pawos 9

Krama Desa Kadadosang:

ha. Mapuankid utawi tan tedun:

1. Rikala mepawangun, ngerebin, meyadnya, nandur, mamulih, matepetin keluasan lan siosan punika manut penglokika prajuru soang soang banjar.
2. Kengin tempo wantah apisan, sajawaning wenten kebebasan prajuru utawi dulu- dulu

na. Krama kadadosang nyada, ngandening yusa manut pawilangan soang soang banjar.

ca. Sane patut nyeledi tur sane kawenangang, risampun manggeh deha teruna sejawaning napuk ahli waris tunggal ngantos yusa 17 tiban

ra. Nutug ayah antuk arta berana nekel utawi kapiambang manut paetangan soang-soang Banjar

ka. prade kalaning ngayah wenten sinalih tunggil krama matilar sedereng puput karya, wenang krama inucap keni pamidanda (ular-alir)

Pawos 10

Wusan dados Krama Desa luire:

ha. Sangkaning:

1. Pinunas ngeraga, menawi kesah kedura Desa utawi ngelangkungin segara
2. Kanorayang, dwaning sampun tan prasida ngehehin solah, maprawerti setata tan setinut ring daging Awig-awig, sane kapastikayang ring soang soang banjar

na. Sang wusan mekrama:

1. Patut ngaturang druwen Desa sane kagambel
2. Tan polih pah-pahan sangkaning padruwen Desa utawi banjar sajawaning pah-pahan ring tempek manut pararem.

Palet 2
Indik Prajuru Lan Dulun Desa

Pawos 11

- (1) Desa Pekraman Kawan kaenter antuk Bendesa Adat
- (2) Banjar utawi tempelan kaenter antuk kelian Banjar utawi tempel
- (3) Bendesa lan Kelian Banjar patut.
 - ha. Bendesa adat mawiwit saking krama ngup
 - na. Kelian Banjar utawi Kelian Tempel manut kahanan
 - ca. Kaadegang malarapan antuk pemilihan olih parumanya soang-soang nyabran 5 (lima) warga, sejawana kacutaponia kangkat kapilih malih apisan.
 - ra. Bendesa lan prajuru desa Pekraman sajeroning keadegang maduluran Dewa saksi ring Bale Agung, Kelian Banjar lan Kelian Tempel manut kahanan.

Pawos 12

- (1) Bendesa Adat kasangra antuk:
 - ha. Petajuh utawi pangliman pinaka wakilnya,
 - na. Penyarikan pinaka juru surat,
 - ca. Penengen utawi pecatu pinaka pengemong druwen Desa,
- (2) Sajeroning ngenterang kasukertan niskala, Bendesa Adat mingsinggihang pemangku kayangan tiga

Pawos 13

- (1) Swadarmaning Bendesa Adat luire:
 - ha. Ngenterang pemargin sedaging awig-awig miwah pararem desa
 - na. Nuntun tur ngenterang krama rawuhin warga Desa ngupadi manut patitis
 - ca. mawosin kalih niwakang pamutus arep ring wicara warga Desa
 - ra. Maka duta Desa matemuang bawos ring sapa sire ugi.
- (2) Prade Bendesa Adat utawi Dulu-dulu iwang pengelaksana keni pamidanda saha keangkat kerarianang manut pararem.

Pawos 14

- Petias utawi olih-olihan prajuru luire:
- ha. Luput rerampen
 - na. Petiyas siosan manut pararem

Pawos 15

- (1) Prajuru utawi Dulun Desa kagentosin riantukan:
 - ha. Seda
 - na. Kanorayang duaning iwang pemargi utawi nilar sesana
 - ca. Wit sakeng pikayun rahayu utawi pinunas ngeraga tur patut kacumponin antuk krama sane ngadegang
- (2) Nganorayang utawi ngentosin Prajuru patut sajeroning paruman tur keingkupan antuk krama sane ngadegang.

Palet 3

Indik Kulkul

Pawos 16

- (1) Kulkul ring desa luire :
 - ha. Kulkul desa
 - na. Kulkul banjar utawi Tempekan;
 - ca. Kulkul sekaa-sekaa.
- (2) Tabuh tetepakan kulkul desa :
 - ha. Tigang tuludan lambat , tatengeran tedun ngayah;
 - na. Atuludan bulus, tatengeran jiwa baya lan arta baya;
 - ca. Kalih tuludan bulus tatengeran geni baya
- (3) Tatengeran kulkul ring soang-soang bebanjaraan :
 - ha. Tatengeran ngerorod (pengantenan)manut kahanan;
 - na. Kulkul kelayu sekaran (putus seda) manut kahanan

Pawos 17

- (1) Kulkul Desa utawi banjar tan wenang katepak yening tan sangkaning pituduh Prajuru utawi dulu-dulun Desa, sejawaning tetengeran kepencabhaya.
- (2) Sang nepak tan sangkaning pituduh patut digelis atur supeksa maka tatujon panepake, yan tan sapunika, patut sang mamurub denda manut **pararem**.
- (3) Kulkul sekaa-sekaa, semalih kulkul pondokan-pondokan tan kelugra nyauiran (matehin) sukat utawi tengeran kulkul Desa prade mamurub taler kadanda manut pararem.

Palet 4
Indik Paruman
Pawos 18

- (1) Paruman utawi sangkepan ring Desa Pakraman Kawan, wenten :
 - ha. Paruman desa utawi Banjar, kawentenang :
 1. Nyabran ngasasih , maka cihna tan arah-arah, duaning sampun tetep panemayan manut pararem bebanjaran soang-soang.
 2. Napkala (padgata kala) maka jalaran arah-arahan manut tetujon.
 - na. Sangkepan Prajuru utawi dulun Desa, Kawentenang manut wiguna;
 - ca. Paruman Sekaa-sekaa manut pabuat.
- (2) Paruman desa utawi Banjar madudonan sakadi ring sor :
 - ha. Prasida lumaksana risampun katedunin antuk sang patut ngamiletin kemanggala antuk tengeran kulkul, miwah mabusana nyalempot, saha tan kalugra makta gagawan saha luire, tan maren ngarcana ring Ida Bhagawan Panyarikan saha Widhi Widana Cane;
 - na. Maka sarana janggi pangawit kalaksanayang cacak sep, saha riwusannya nyacak dadosan ageng alit manut pararem;
 - ca. Tan kedadosang ngemijilang suara goro utawi biute, yan wenten asapunika keni pamidanda biya pecambil kadi dandaning nguman-nguman ring saba;
 - ra. Pamutus babawosan beriuk sapanggul utawi (ingkup) punika kamanggehang.
- (3) Prade pidaging paruman tan kaingkupin mangda Prajuru utawi Dulun Desa ngilikang babaos saha putusannya mangda kararemin antuk Krama Desa malih tan praside kasungkeman jantos ping tiga Prajuru utawi Dulun wenang nunas baos ring sang ngawiwenang.

Pawos 19

- (1) Sajeroning paruman Desa utawi Banjar Adat, Bandesa Adat utawi Prajuru Adat patut nyiarang pamargi ngenterang desa pemekas utawi Banjar Adat nganinin indik:
 - ha. Munjuk lungsur ring pakraman saha ayah-ayah, sulur arta berana, druwen desa utawi banjar;
 - na. Rencana Prajuru utawi Dulu nganinin usaha desa kapungkur
- (2) Pamutus paruman desa sinanggeh pararem maka pamitegep pelaksanaan Awig-awig.

Pawos 20

- (1) Sangkepan prajuru utawi Dulun Desa kawenangan wantah ngerincikan pangerencana usaha desa kapungkur.
- (2) Sangkepan Prajuru utawi Dulun Desa tan kawenang ngwedalang tategenang ring krama sadereng kaingkupin antuk Krama Desa utawi banjar.
- (3) Pamutus sangkepan Prajuru utawi Dulun Desa ngewetuang pasuara, maka daging pituduh sang ngawiwenang utawi ngonekang pecak pararem Krama Desa

Palet 5

Indik Druwen Desa pekraman lan Banjar Adat

Pawos 21

- (1) Padruwen Desa Pekraman Kawan, sakadi ring sor :
 - ha. Pura Bale Agung.
 - na. LPD desa pekraman kawan
- (2) Padruwean banjar kadi ring sor :
 - ha. Pura Puseh, Pura Dalem Setra lan Pura Bayugeni kaemong antuk krama Banjar Pule
 - na. Dalem Purwa, Dalem Pingit lan Pura Pengrubungan kaemong antuk krama Banjar Kawan
 - ra. Dalem Penunggekan kaemong antuk krama Banjar Blungbang
 - ka. Dalem Cungkub lan Pura Pegringsingan kaemong antuk krama Banjar Geriye
 - da. Penataran Puri Dencarik kaemong antuk krama Banjar Puri Dencarik
 - ta. Dalem Agung, Dalem Pingit, Penataran Kentel Jagat lan Melanting kaemong antuk krama Banjar Nyalian
 - sa. Krama Banjar Puri Kanginan madruwe amongan ring Pucak Hyang Ukir.
 - wa. Balai Banjar Druwen soang-soang Banjar
 - la. Tanah tegalan utawi carik;
 - ma. Karang ayahan Desa
 - ga. Setra-setra
 - ba. Pelaba pura
 - nga. Lelanguan, makadi tatabuhan ilen-ilen padruwen bebanjaran.

Pawos 22

- olihan- olihan Desa Pekraman Kawan luire :
- ha. Paica saking Guru Wisesa;
 - na. Urunan krama Desa Adat;
 - ca. Pahan pikolih sakeng LPD desa Pekraman Kawan
 - ra. Paica utawi usaha siosan, sane patut.

Pawos 23

- (1) Prajuru desa wenang ngetangang pamupon laba Pura lan sapenunggalan druwen Desa;
- (2) Prajuru banjar wenang ngetangang pamupon laba Pura lan sapenunggalan druwen Banjar ;
- (3) Pikolih lan pamuponnya keanggen prabia piodalan saha wewangunan ring Pura;
- (4) Nyabran pasangkepan desa, Prajuru pengemong druwe ngawentenang pari indik munjuk lungsuring padruwen ring Krama Desa;
- (5) Sakeluiring druwe Desa patut wenten ilikitannya;
- (6) Tan kalugra ngadol utawi ngesahang padruweyan Desa yan tan kasungkemin antuk Krama Desa.

Palet 6

Sukerta Pamitegep

Kaping 1

Karang, Tegal lan Carik

Pawos 24

- (1) Krama Desa pangemong karang Desa, patut ngewatesin karang inucap antuk tembok mangde pakantenannya asri.
- (2) Wates sisi kaler miwah kangin patut karyaning antuk sang ngemong karang ayahan inucap, sane mawasta magaleng kaluwan. Sejawaning tanah pecatu, tegal utawi tanah padruwiyen ngeraga, sane kapiara batase sisi kelod miwah kawuh, reh punika mawasta magaleng teben.
- (3) Prade kerasayang pagehan utawi turus inucap ngelikadin, yan pada arsa penyandinge, kengin batase nganggen pinget kewannten kesaksi antuk Prajuru utawi Dulu Desa utawi precihna pal sang rumawos.
- (4) Prade wenten karang kebebeng mangde kautsahayang wenten pemargin niya.

- Prade wenten nyepuh karang ayahan Desa, patut keni ayah-ayahan manut ring Banjar marep.

Pawon 25

- (1) Smalah tunggil krama Desa utawi Banjar tan kalugra:
ha. Ngalah-alah margi, tepal, ayahan Desa karang Desa lan sapanunggilnya
na. Ngalah-alah, tegak kayangan, setra lan sekancan tegak sinanggeh suci
- (2) Prade wenten sekadi ring ajeng, sang ngalah-alahang patut ngewaliyang tanah inucap saha keni pamidanda sepatutnya, kadulurin upakara ring pengalah-alah tanah suci.

Kaping 2

Pepayoman

Pawos 26

- (1) Ngawit nandur pepayonan tanam tuwuh adepa agung ngajeroangang sakeng bates, prade wenten jantos ngeliwat bates wenang kasepat gantungin.
- (2) Yening wenten tetanduran ngungkulin, semaliha mawastu mayanin kapisaga patut kewara antuk paiguman ping ajeng prasida sang nruwenang wit ngerebah utawi notor.
- (3) Prade sampun kawara taler tan wenten usaha sang nruwenang wit, sang rumasa ketetehan kajerihan wenang mesadok ring Prajuru utawi Dulu, tur risampun kapritatas kalugra ngicalang wit inucap, sakewanten patin pepayonan patut ketawur manut pangelokika sane nepasin.
- (4) Sang keni pamidanda penyangaskara saha prabiya manut pararem arep ring wewangunan sang karubuhan luire:
ha. Sang nruwennag wit sinanggeh mayanin, prade pungkut ngarubuhin wewangunan krama tiyos
na. Sang notor, munggul utawi ngarebah, taru tur ngerubuhin krama tiyos.
- (5) Krama desa patut ngemanggehang kawerdian tanam tuwuh sane ngawinang Desanne asri tur lestari (Lingkungan Hidup)

Kaping 3
Wewangunan
Pawon 27

- (1) Nyabran ngwangun patut :
 - ha. Masadok ring prajuru utawi Dulu lan sang remawos ping ajeng prade wewangunan ngenenin wates;
 - na. Ngutsahayang ngangge gegulak Asta Bhumi miwah Asta Kosala-kosali, sanistane manut ring patitis niskala;
 - ca. Tan ngayubin kapisaga.
- (2) Prade wewangunan jantos nyayubin bilih-bilih temboke ring telengin wates risampun kawara tur kasadokang ring prajuru wenang kadanda manut pararem saha tembok inucap kagubar utawi sanistane mangde kakarianang abangan.

Kaping 4
Wewalungan
Pawos 28

- (1) Sahanan warga Desa sane mamiara wawalungan bawi risampun mabelas, utawi banteng masaluk tali lan selantur ipun patut sayaga nitenin negul utawi ngelopor mangde tan ngarusakin karang utawi paabianan krama sios, bilih-bilih jantos ngeranjing ngeletehin Kayangan.
- (2) Prade wenten wawalungan ngelumbar utawi ngeleb ngerusakin pekarangan utawi pabianan krama sios, risampun keware kengin kataban tur kadanda wit sane ngerusak saha nawur penebus papiaraan tetabanan anut pengelokika Prajuru utawi Dulun Desa.
- (3) Prade jantos ngletehin tegak suci, minekadi Pemerajan (Sanggah Kemulan) risampun kapitatas antuk Prajuru utawi dulu, wenang sang nruwenan kedanda mabuhu agung tebasan prayascita, duurmanggala utawi Pancasata iwak bebek belang kalung prade jantos ngeletehin Kahyangan Tiga utawi Pura Pamaksan.
- (4) Krama desa patut nyangra wewalungan miwah sarwa prani, tan kapatut ngemademang paksi miwah nuba ulam, miwah sane siosan manut uger-uger saking sang rumawos.

Kaping 5

Indik Bhaya

Pawos 29

- (1) Pari indik bhaya luire: jiwa bhaya, artha bhaya, geni bhaya, dura cara ring agama
- (2) Sang manggihan kebanan jiwa bhaya, patut nepak kulkul bulus mapitulung manut pawos 16 (2) aksara na.
- (3) Prade ring desa kebanan jiwa bhaya, patut desane ngaturang Bhuta Yadnya tur sang mayanin katur ring Sang Ngawe wenang.
- (4) Prade wenten jatma mamisuh utawi nguman-nguman jatma tios, kakenin pamidanda biya pecambil tebasan prayascita.

Pawos 30

- (1) Sang manggihan kehanan arta bhaya (kemalingan), patut ngukul mapitulung anut ring pawos 16 (2) aksara na, utawi sang kemalingan atur upeksa ring prajuru utawi Dulun Desa lan sang rumawos sane pacang nimbangin utawi nandanin anut daging KUHP saha mawuwuh penyangaskara prade wenten jadma ngemaling arta sinanggeh suci.
- (2) Pratingkahe mapailon ring dusta kebawos saroro prade wenten jadma manggihin maling tan nyadekang ring prajuru utawi Dulu jantos jadma tiyos nyaduwang, patut kadanda kadi dending maling tur prade jantos pang tiga melaksana asapunika wenang kasukserah ring sang ngawe wenang.
- (3) Prade wenten jadma ngerereh reramon, mekadi daun kelapa, ron, miwah sane tiyosan tan pesadok ring sang nruwenan wit prade kacunduk (ketara) patut kedanda kadi dending maling.
- (4) Yening wenten jadma ngeranjing pakubon wiadin pekarangan rikala suwung mewastu sang madruwe karang kaicalan, wenang jadma inucap katuwekang antuk madewa saksi ring Pura Bale Agung.
- (5) Mangde tan katuwekang manut ring ajeng, asing-asing ngeranjingan kubon jadma tiyos patut:
ha. Matengeran swara (mekaukan)
na. Nyantos sang nruwenang karang rawuh, utawi mesadok ring pengapit pinih tampek, maka buwatan pengeranjinge

- ca. Pamedal karangnya kadanginin sawen, maka cihna mapengarah rikala suwung.

Kaping 6

Penyanggran Banjar

Pawos 31

Krama Banjar rikala ngewentenang karya suka duka, patut kesanggra antuk luire:

ha. Prade ngewangun Pitra Yadnya utawi Manusa Yadnya manut pinunas sang meyadnya.

na. Pangerombo utawi karya gotong-royong Krama manut kahanan.

SARGA IV

SUKERTA TATA AGAMA

Palet 1

Indik Dewa Yadnya

Pawos 32

- (1) Palinggih panyiwian sawidangan Desa Adat Pakraman Kawan luire :
Kahyangan Tiga: Pura Desa utawi Bale Agung, Pura Puseh miwah Dalem manut pawos (21) aksara ha.
- (2) Rahina Piodalan soang-soang inucap, kadi ring sor :
- ha. Pura Puseh lan Pura Bale Agung ring Banjar Pule saniscara Kliwon Wuku Uye, Taler Pure Dalem Setra ring Banjar Pule Tilem Kepitu, Pura Bayu Geni Saniscara Kliwon Wariga
- na. Pura Dalem Purwa utawi Dalem Pingit ring Banjar Kawan, Anggara Kliwon Wuku dukut
- ca. Pura Dalem Penunggekan ring Banjar Blungbang Anggara kliwon Wuku Tambir
- ra. Dalem Agung ring Banjar Nyalian, Anggara Kliwon Wuku Tambir, pure Dalem pingit Bude Manis Medangsia, Pure Penataran Kentel Jagat Wraspati Umanis Ugu, Pure Melanting Budha Wage Merakih
- ka. Dalem Cungkub utawi Pura Pengringsingan ring Banjar Geriya, Anggara Kliwon Wuku Kulantir.
- da. Penataran ring Puri Dencarik, Buda Kliwon Wuku Ugu

- ta. Pura Pucak Hyang Ukir Banjar Puri Kanginan Anggara Kliwon
Wuku Tambir.
- su. Pura Pengrubungan Budha Wage Merakih.

- (3) Pengaci ring pura inucap manut kecap sastra agama.

Pawos 33

- (1) Ring soang-soang Pura inucap kewentenang Pamangku.
- (2) Ngadegang Pamangku manut dadudonan :
- (3) ha. Turunan utawi ngewaris;
na. Nyanjan utawi masemurang, soang-soang mapiteges mapinunas
ring ajeng natar, wiyadin ke pura Desa manawi ring balian konteng,
lan sapanunggilannya.
ca. Kacatri (kasudi) oleh krama desa.
ra. Lekesan
- (4) Tan kewenang anggen Pamangku, luire :
ha. Ceda angga luire: peceng, perott, cungh lan sapanunggilannya;
na. Sang sapisira ugi sane tan kepatutang manut pararem;
ca. Sakit ila, ayan, buduh, utawi sane tiyosan;
ra. Sane madrebe kasucian urip tan becik.
- (5) Prabya kapamangkuan :
ha. Madiksa Widhi (ngawintenin) kemedalan saha kelaksanayang antuk
sang ngadegan, makadi krama Desa utawi pangempon pura soang-
soang;
na. Mapitra Yadnya riwekas patut kasungkemin antuk krama desa
utawi pangemong sanistane sawa geni utawi sawa swasta
panyangrane manut pararem.
- (6) Pamangku patut ngamanggehang sesasaning pamangku, luire: tan
wenang ajejuden miwah sane tiyosan. Mekadi sane munggah ring yama
brata, niyama brata.

Pawos 34

- (1) Swadharmaning pamangku luire :
ha. Ngenterang upacara piodalan ring kahyangan utawi ring soang-
soang pakubon krama;
na. Tan wenang salab-sulub, yan mamurug wenang pamangku inucap
nyepuh raga;

- ca. Prade sinalih tunggal pamangku kaptalang utawi cuntaka, kengon nyelaang pamangku kahyangan tiga tiyosan utawi nurur sang sulinggih;
 - ra. Semaliba yen sampun pamangku ngayah ring Pura, Prade sinalih tunggal wenten kaluanganya tunggal pekarangan kelayusekaran, Mangku mucap tan kengon cuntaka sakewanten Mangku tan budal selama piodalan.
- (2) Fetiyas utawi olih-olihan pamangku, manut perarem suang-suang banjar luire :
- ha. Panyolasan miwah pejati lan sarin canang manut pararem;
 - na. Upon pelaba carik miwah tegal manut pararem;
 - ca. Luput pakaryan lan utawi reramon, pedagingan manut kahanan.
 - ra. Polih pangangge arangsukan manut pararem
 - ka. Olih-olihan tiyosan manut pararem.

Pawos 35

- (1) Pamangku kagentosin riantuk :
- ha. Seda,
 - na. Pinunas ngeraga, menawi kegeringan lan sapenunggalannya, saha kasungkemin antuk sane ngadeggang ;
 - ca. Kawusanang antuk krama menawi riantuk melaksana tan patut (asta dusta).
- (2) Prade pamangku kawusanang sangkaning melaksana asta dusta keni pamidanda manut pararem.

Pawos 36

Kasukertan kahyangan kadi ring sor :

- (1) Tan kalugra ngranjing ring pura luire :
- ha. Sang ketiben cuntaka mekadi pawos 42;
 - na. Makte sahananing barang-barang sane ngeletehin;
 - ca. Sato agung, sajewaning rikalaning upacara mapade;
 - ra. Mabusana tan manut kadi tata caraning ngranjing Pura;
 - ka. Sadereng polih uak-uakan (pituduh) Prajuru utawi Dulu Desa
- (2) Patingkahe tan wenang ring Pura :
- ha. Masumpah (cor) sejawaning pituduh Prajuru utawi Dulun Desa
 - na. Masenengan, makolem dados asiki lanang wadon, nyangsang busana, mecikang pusungan, macecepin

- ca. Mungguh tedun palinggih sajewaning pituduh prajuru utawi Dulu
- (3) Sang mamurug kecaping ring ajeng keni pamidanda prayascita sepatutnya manut pararem

Pawos 37

- (1) Yen wenten jadma karawuhan ring Pura, kengin kepintonin prade rumasa kesumbangsayain tan wiyakti jatma inucap kesisipang manut pararem
- (2) Prade kahyangan kahanan durmanggala kepanca bhaya pemangku digelis nyadokang ring dulu mangde marumang krama tur ngawentenang pemerascita sepatutnya.

Palet 2

Indik Rsi Yadnya

Pawos 38

- (1) Sang pacang madeg Pandita utawi pinandita minakadi Balian sonteng, dalang, sakeluiring jagi ngenterang yadnya patut masadok ring prajuru kalih ring Parisada Hindu Dharma.
- (2) Prajuru desa patut ngawas, nitenin tur wenang ngalangin, prade wenten kacihnian sasar, nyiarang ring paruman tegep rauhing wates kawenangan pangenter yadnya.
- (3) Krama desa patut ngaturang ayah sapemadeg, panglepas ring sang sulinggih sane kaadegang riwekas katuntun antuk prajuru utawi Dulu-dulu.

Pawos 39

- (1) Sang sulinggih sané kaadegang patut ngerihinin ngayunin ring wewidangan jagat utawi Desa Adat Kawan, sesampune wawu muputang Yadnya sajebag tiyos jagat utawi kedura Desa.
- (2) Krama Desa sami patut sareng ngawas nitenin, katuntun antuk Prajuru utawi Dulu, mangde sahanan yadnya sane kawentenang kaicen pamuput oleh Pedanda utawi Pinandita manut kawenangannya soang-soang.

Palet 3
Indik Pitra Yadnya
Pawos 40

Pemargin Pitra Yadnya madudonan manut sekadi ring sor:

- (1) Pangupakaran Sang kalayu sekaran;
 - ha. Antuk upakara apemendeman ring pertiwi utawi kageseng manut kahanan suang-suang.
 - na. Pemargi upacara pemendeman nenten ngetang lanang wadon yadiastun sawone kalih
 - ca. Upakara pangabènan utawi plebon
- (2) Upakara-upakara Pitra Yadnya riwusan keabenang mewastu mungah daun bingin (ngeroras) wawu kelaksanayang Ngelinggihang Dewa Hyang, Bhetara utawi Bhetari.

Pawos 41

Swadarmaning lan tategenan krama prade wenten sinalih tunggil krama kelayu sekaran:

- (1) Sang kaduhkitan patut;
 - ha. Nyadokang ring Klijan Banjar tur nunas tetimbangan ring kawentenan nyane;
 - na. Ngaturin Banjar ngrombo makarya eteh-ete saha kadulurin panyembrahma canang, manut kawentenan.
- (2) Swadarmaning Banjar utawi Desa;
 - ha. Klijan Banjar maritatas pamargin sang kaduhkitan, napike pacang kapendem, makingsan rihin utawi lantur keabenang;
 - na. Prade kapendem, raris kawentenang kulkul petau antuk pawos (3) aksara na, antuk Klijan Banjar utawi petajuh.
 - ca. Panyangran Banjar selanturnya :
 1. Indik petedunan manut kahanan soang-soang Banjar.
 2. Ngerombo ngaryanin eteh-ete sawa
 3. Sami krama Banjar nyarengin ke setra jantos puput .
 4. Kengin ngalelet sawa manut kahanan tur patut polih pegebagan, anut paetangan kelian
 5. Tan kalugra nginepang bangbang, miwah mendem rikala kekeran
 - ra. Prade wenten kelayu sekaran, rikala piodalan, kengin mekingsan ring setra siosan, pemargi selanturnyane nganutin pemargi banjar inucap
 - ka. Prade Ngewentenang upacare atiwa-tiwa patut kemargiang ring setra inucap

Pawon 42

(1) Sane kasinangeh kacuntakan sekadi ring sor :

- ha. Cuntaka antuk belayu sekaran;
- na. Cuntaka antuk ngeraja sewala;
- ca. Cuntaka antuk ngembasang putra;
- ra. Cuntaka antuk karuron;
- ka. Cuntaka antuk sakit ila, buduh;
- da. Cuntaka antuk pawiwahan;
- ta. Cuntaka antuk gamea gamana;
- sa. Cuntaka antuk salah timpal;
- wa. Cuntaka antuk yening wenten anak istri mobot nenten kaupakarayang pabiya kaonan tur pawidi widanan;
- la. Cuntaka antuk mamitra ngalang.
- ma. Cuntaka antuk yening wenten anak istri ngwentenang putra sadurung maupakara pabiyokawonan tur pawidi widanan
- ga. Cuntaka antuk Sad tatayi

(2) Sengker cuntaka manut kawentenannya :

- ha. Cuntaka kelayu sekaran, cuntakannya sang kelayu sekaran ngantos pengapit miwah pemapas pemesu manut kahanan banjar suang-suang;
- na. Cuntaka ngeraja sewala, 3 (tigang) rahina ngawit sakeng ngeraja sewala utawi selami ngeraja sewala;
- ca. Cuntaka ngembasang putra sane istri 42 rahina (abulan pitung dina) ngawit sakeng putranya embas, utawi ngantos sampun kaupakarayang makekambuh tur maparayascita manut agama, sane lanang ngantos kepus odel;
- ra. Cuntaka karuron cuntakanya 42 rahina (abulan pitung dina) tur sampun matirta pamrayascita;
- ka. Cuntaka pawiwahan, cuntakanya ngantos sesampun matirta pabiyo kaonan;
- da. Cuntaka gamea gemana cuntakannya ngantos sesampune kapalasang utawi masapihan tur sampun kawentenang pamrascita raga tur sampun kawentenang pemersih banjar
- ta. Cuntaka salah timpal, manut agama Hindu tur dresta utawi adat soang-soang.

- sa. Cuntaka anak istri mobot nenten kewentenang upakara pabiya kaonan, cuntakannya ngantos ngwentenang upakara pabiya kaonan;
- wa. Cuntaka mamitra ngalang, cuntakanya ngantos kawentenang upakara pabiyakaonan kapasahang tur kawentenang pemerascita raga;
- la. Prade ngembas putra tan saha widi widana cuntakanya ngantos kawentenang pemerascita raga biyang lan okanyane.
- ma. Cuntaka sad tatayi cuntakannya ngantos sampun pemerascita raga tur nenten pisan dados ngemungganghang upacara paduwijatian.
- (3) Cuntaka kelayu sekaran :
- ha. Kapendem cuntakanya
1. Cuntaka sebel Banjar 3 (tigang) rahina riwusan mendem utawi 3 (tigang) rahina sesampun upacara pamendeman.
 2. Keluarga sajeroning pakarangan ngantos wusan merebu.
- na. Kaaben cuntakannya :
- Sang nyambut karya pitra yadnya cuntakannya ngawit sakeng ngadeggang ngantos merebu.
- (4) Sane katiben cuntaka luire :
- ha. Kelayu sekaran sane kacuntakan:
1. Sakeng sane kelayu sekaran
 2. Kaluarganya
 3. Bebanjaran
- na. Ngeraja Sewala sane cuntaka:
- Sang sane ngeraja sewala
- ca. Ngembas putra sane cuntaka:
- Sane ngembasang , lanang wiadin istri
- ra. Pawiwahan sane kacuntakan:
- Sang sane kaupacara pawiwahan lanang wiadin istri
- ka. Karuron sane kacuntakan:
- Sane istri
- da. Gamia gemana sane kacuntakan:
1. Sang sane ngelaksanayang gamia gemana
 2. Banjar adatnyane
- ta. Anak istri mobot tan saha widi widana sane kacuntakan:
- Sang sane mobot
- sa. Amitra ngalang sane kacuntakan:

Sane ngelaksanayang amitra ngalang lanang istri
wa. Ngembasang putra nenten maupakara pawidi widanan sane
kacuntakan:

1. Sang sane ngembasang putra
 2. Putra sane kaembasang
- (5) Tan keneng cuntaka luire:
ha. Sang sulinggih lan mangku kahyangan tiga
na. Rikala piodalan risampun pemangku wenten ring Pura, prade
kaluarganya seda pemangkunya jenek ring Pura.

Pawos 43

- (1) Atiwa-atiwa (pangabenan) kalaksanayang manut Agama Hindhu tur
manut sima dresta ;
- (2) Panemaya pangabenan wenten kalih pawos ;
ha. Ngaben dadakan utawi bah bangun, kedadosang sedurung
ngemargiang tirta pengentas utawi pemerelina;
na. Ngaben ngamasa sajeroning banjar.
- (3) Dudonan ngaben ngawit sakeng ngagah utawi seda, ngeseng jantos
pangiriman utawi nganyut.

Pawos 44

Peputusan pangabenan wenten kalih pawos :

- ha. Ngaben dadakan manut kahanan
na. Ngaben ngemasa manut pararem

Pawos 45

Kekeran Desa Pekraman sejeroning pelebon utawi pengabenan luire :

- ha. Wuku Sinta
na. Wuku Kulantir
ca. Wuku Merakih
ra. Wuku Tambir
ka. Wuku Uye
da. Wuku Ugu
ta. Wuku Dukut
sa. Wuku Medangsia .

Palet 4

Indik Manusa Yadnya

Pawos 46

- (1) Manusa yadnya inggih punika upacara-upacara dharmaning manusa ngawit sakeng patemoning kama bang sajeroning garba kalayu sekaran riwekas.
- (2) Upacara kadi ring ajeng madudonan sekadi ring sor :
 - ha. Magedong-gedongan duk pangerempinian ibiang;
 - na. Duk sang kamareka medal;
 - ca. Kepus udel;
 - ra. Roras rahina;
 - ka. Tutug kambuhan (42 rahina)
 - da. Tigang sasihin
 - ta. Pawetuan utawi oton utawi odalan (6 sasih)
 - sa. Tutug kelih (ngeraja wadone, ngembakin lanangne)
 - wa. Matatah utawi mapandes;
 - la. Mawiwaha;
 - ma. Mawinten.
- (3) Upacara-upacara inucap nista, madya, utama manut sastra agama saha catur dresta maka pamikukuh desa dresta, ngawinang sima cara desa.

Palet 5

Indik Bhuta Yadnya

Pawos 47

- (1) Bhuta yadnya indik punika upacara-upacara beyakala ring pertiwi lan kahyangan, sarwa prani saha upacara-upacara ring bebutan.
- (2) Upacara pebiyakala ring sarwa prani, luire :
 - ha. Ring sarwa tumbuh rikala Tumpek Pangatang (Saniscara Kliwon Wariga);
 - na. Ring sarwa ingon-ingon rikala Tumpek kandang (Saniscara Kliwon Uye).
 - ca. Upakara pekala-kala manusa anut ring wiguna, kebawos pabeyakala.
- (3) Upakara pabeyakala ring pertiwi, kahyangan lan babutan kewastanin macaru.

- (4) Pacaruan inucap ring ajeng nista, madya, utama manut wiguna kadi ring sor :
- ha. Eka Sata; ka. Panca Kelud;
 na. Panca Sata; da. Tawur Agung;
 ca. Panca Sanak;
 ra. Resigana;
- (5) Sejawaning ring ajeng kawentenang upakara :
- ha. Yadnya sesa utawi mejot-jotan nyabran wusan meratengan.
 na. Masapuh-sapuh rikala pacang wali ring pura.

Pawos 48

- (1) Ngangken ngewarsa riakalaning Tilem Kesange kawentenang tawur kesanga ketah bawose Ngerupuk, maka cihna pacang mapag Panyepian Benjangne.
- (2) Upacara panyepian sane kamargiang olih Krama Desa;
 ha. Amati geni, tan kengin meapi-api;
 na. Amati karya, tan kengin ngambil karya;
 ca. Amati lelanguan, tan kengin maoneng-oneng, masuara gora
 ra. Amati lelungan, tan kengin mlelungayan medal akeng pekarangan
- (3) Paberatan inucap kamargiang arahina sakeng some, ngantos benjang semeng raris kasuarayang kulkul punika maka cihna pengembak.
- (4) Sang amurub akecaping ajeng keni pamidanda manut pararem banjar utawi tempek soang-soang antuk patelik Pacalang Desa.
- (5) Riwus rahina Nyepi maka cihna pangawit Icaka Warsa, patut soang-soang warga desa sami ngaksama utawi Dharma Santi.

PANCAMA SARGAH SUKERTA PAWONGAN

Palet 1

Indik Pawiwahan

Pawos 49

- (1) Pawiwahan indik punika patemoning purusa pradana, malarapan panunggalan suka cita kaduluring upasaksi sekala-niskala.
- (2) Penglaksanaan pawiwahan luire :
- ha. Pepadikan, kamenggala antuk pakraman banjar soang-soang;
 na. Ngerorod, merangkat rihin wawu kakrunayang;

ca. Nyeburin utawi nyentana rajeg.

(3) Pidabdab sang pacang mawiwaha, patut :

ha. Sampun manggeh daha teruna (presida nyanutin Undang-undang)

na. Sangkaning pade rena (tan kapaksa);

ca. Nyanut kecaping agama (tan gamia gemana)

ra. Kasudiwadani prade pangambil tiyos agama.

ka. kepatiwangi kemargiang manut Desa Kala Patra Banjar soang-soang.

(4) Pamargin pawiwahan mangda taler nyanutin Undang-undang Perkawinan saking sang ngawiwenang.

Pawos 50

(1) Pawiwahan sane keputusang ring soang-soang banjar Pekraman, sekadi ring sor :

ha. Sampun ngemargiang pabiye kala utawi pesakapan sekala niskala antuk pandita utawi pinandita;

na. Upasaksi prajuru utawi Dulu Banjar soang-soang sane nyarwakang utawi ngilikitayang pawiwahan.

ca. Sampun matengeran swaraꦏ kulkul manut dresta banjar soang-soang.

ra. Pawiwahan inucap ring ajeng raris keilikiteyang ring kantor Camat utawi Kantor Catatan Sipil Kabupaten Bangli.

(2) Pabyakaonan sane tan anut kadi ring ajeng sinanggeh tan patut utawi tan sah.

Pawos 51

Tata caraning perabiyen patut sekadi ring sor:

(1) Sapa sire ugi pacang ngwarangang pakulawarga patut masadok ring prajuru utawi Dulu-dulu, selanturnya prajuru utawi dulu maritatas manut kakecap perabiyenne;

(2) Pamargin pepadikan manut dudonan :

ha. Pakrunan jantos ping 3 (tiga), saha soang-aoang malarapan :

1. Antuk canang penyangas;

2. Kaping kalih antuk canang ring sajeng;

3. Kaping tiga antuk tipat bantal, kabawos pamuput pepadikan.

4. Pamargin a,b,c kemargiang manut kahanan

na. Risampun mapragat raris sang istri keajak budal ring pakubon sang lanang saha ngealnturang antuk pabyakala.

- ca. Mangde tumus sangkal niskala, raris kulawarga purusa makta pejati ring merajan wadone.
- ra. Pemargin pepadikan inucap manut kahanan suwang-suwang banjar.
3. Prade ngerorod utawi merangkat, patut keluarga lanangne ngewentenang pamilaku utawi pejati antuk duta sakirangnya kalih diri.
4. Sajeroning pakrunan pengelukaan patut :
- ha. Kemanggala antuk geng pengampura arep ring kaluwarga wadone.
- na. Kaigumang bawos indik pakidih utawi pelakuan arep ring pasuwakan sang ngidin saha dewasa pekrabkambeyan riwekas;
- ca. Kecihnayang indik kapurusa utawi prade sentana rajeg kajejerang kpatut ngidih anak lanang sane kabawos pawiwaha nyeburin, tur risampun sulur upakara kategepin kemanggehan santana nyeburin.
- ra. Prade tan terima pejati, pakrunane kamargiang jantos ping tiga.
5. Pekerabkambeyan mapiteges upacara tinas apadang (puput) mapikuren duaning manut sekadi ring sor :
- ha. Sajeroning kabawos ambe ngadungan kalaksanayang ring sekala niskala antuk sarana jejauman miwah mawidi widana :
1. Jejauman pinaka ngambe utawi ngadungang kayun soang-soang pakulawangan druwene;
 2. Widi widana pinaka pejati niskala nunas waeden ring pameran kamulannya.
- na. Sajeroning bawos krab pelaksana ring sekala :
1. Antuk panyaksi krama banjar, duaning kakerabang antuk tengeran kulkul;
 2. Pamekas panyaksi prajuru utawi dulu saha ngilikitayang.

Palet 2

Indik Nyapian

Pawos 52

- (1) Pawiwahan presida kawusanang malarapan antuk palas marabian utawi lampus.
- (2) Wusan mapikuren riantukan silih situnggil seda mapiteges balu, mekadi balu lanang utawi balu istri.
- (3) Palas merabian wenten kalih pawos, inggih punika sangkaning pada lila miwah mawiwit wicara.

- (4) Sang ayat palas merabian patut atur supeksa pailikitan riyin ring sang rumawos (pengadilan negeri) wasta tinas apadang pamutuse kabawos nyapian, wawu dulu nyiarang kawentenannya ring desa saha keni panumbas suara kulkul manut pararem.

Pawos 53

- (1) Tata cara palas marabian sangkaning pada lila sekadi ring sor :
- ha. Nawur prabiya pesaksi sinalih tunggil sami makuehnyane limangatus tali rupiah utawi 50 Kg beras;
 - na. Pagunakaye polih pahan pada;
 - ca. Pabekel, tadtadan soang soang kekuasa niri-niri warisan kekuasa antuk purusa;
 - ra. Ngaweruhin miwah ngupajiwa pretisentana manut swadarmaning guru rupaka;
 - ka. Naur pamidanda panumbas kulkul manut pararem;
 - da. Ngelung jinah logika prajuru utawi dulu;
- (2) Prade wenten palas merabian wit sane san wicara patut kapidanda mapangarge katah 1 juta rupiah utawi 100 Kg beras

Pawos 54

- Prade riwekas sang palas kecihnang adung malih, patut :
- ha. Ngelaksanayang pawiwahan malih

Pawos 55

- (1) Sang balu kabinayang dados :
- ha. Balu luh wit sentana (sentana rajeg) miwah balu luh boya sentana;
 - na. Balu muani kapurusa (wit sentana) miwah balu muani nyeburin (boya sentana).
- (2) Swadarmaning balu inucap patut :
- ha. Ngemangehang patibrata tan kengin ngamargiang para dara/drati krama
 - na. Ngusahayang pegunakaya dados ngadol, ngadeang, makidihang lan siosan punika, sajawaning kabebasan sakeng pianak utawi kulawarga pinih tampek sakeng kurenannya prade pianak kantun alit-alit.

- ca. Kengin ngidih sentana prade wenten pidabdab sedurung sinalih tunggil lampus saha kebebasang antuk keluarga sinanggeh kepurusa;
- ra. Kewenangan mawiwaha malih
Balu kaucap tan pageh sekadi ring sor :
- ha. Drati krama utawi paradara;
- na. Matilar sakeng pakubon tan pasadok jantos 6 (enem) sasih ninggal kedaton;
- ca. Lempas ring swadarma tiyos-tiyosan tan prasida ngesehin salah maprewerti arep ring kaluwarga purusa
- ka. Balu inucap dados kalepasang sakeng kaluarga kapurusa.

Palet 3

Indik sentana

Pawos 56

- (1) Setana wenten kalih pawos, sane kaucap preti sentana miwah sentana peperasan.
- (2) Prati sentana inggih punika sentane sane metu saking pawiwahan kapatut.
- (3) Prade pawiwahan tan patut, ngwetuang sentana, mangde tan kantung kawastanin babinjat utawi astra, patut kemanggala antuk penyangaskara.
- (4) Prada pawiwahan tan prasida ngwetuang sentana kengin ngidih sentana antuk upasaksi niskala, sekala sane kawastaning sentana peperasan
- (5) Sentana rajeg inggih punika, prati sentana wadon (pradana) sane kemanggehang lanang (puruse) tur risampun ngelaksanayang pawiwahan nyeburin.
- (6) Sang sane dados kaarsayang sentana rajeg inucap wiwit 4 (empat) inggih punika:
 - ha. Prati sentana wadon tunggal;
 - na. Sampun kemanggehang dados preti sentana lanang (purusa);
 - ca. Kapawiwahang kaceburin, kautamayang antuk jatma sane maagama Hindu utawi jatma sane maagama siosan sane sampun ngelaksanayang pamarisuda raga utawi sudiwadani;
 - ra. Sane manggehang sentana rajeg patut masadok ring I prajuru banjar tur I kelian banjar patut nyiarang ring banjar saha ngaturang ring prajuru Adat. Atur ngelantur ring guru wisesa.

Pawos 57

- (1) Ngangkat sentana manut dudonan patut makacihna artha brana pamerasan sane kesaksiang sekala niskala.
- (2) Sapa sira ugi krama pacang ngidih sentana patut masadok ring prejuru adat sanista asasih sedereng pamerasan.
- (3) Prajuru kewakilin antuk klian banjar nyiarang ring sawidangan desa, sang sapa sira ugi rumaksa tan lina mangda nyadokang masengker kalih wuku sebanen pamerasan masadok ring prajuru adat
- (4) Prajuru utawi dulu desa digelis mawosin saha ngicenin pamutus napak ring catur dresta miwah ring pararem.
- (5) Prade sulur paperasan tan manut kecape ring ajeng, Prajuru wenang ngandeg sang pacang makarya, saha ngicenin penuntun mangda kapuputan riin bebaos sulur utawi wicarannya.

Pawos 58

- (1) Paperasan sane kapatut ring desa risampun makacihna :
 - ha. Widi widana pamerasan;
 - na. Kesaksiang antuk Prajuru sane makelingang utawi ngilikitayang tur;
 - ca. Kasiarang ring wewidangan banjar.
- (2) Sane patut kaanggen sentana kadi ring sor :
 - ha. Jatma maagama Hindu;
 - na. Kapernah nedunang saking sang meras
 - ca. Kulawarga sakeng purusa, prade tan wenten kengin saking wadon yening taler tan wenten, wawu kengin sakama-kama (saking kayun);
 - ra. Kautamayang saking waris pancer kapurusa;
 - ka. Sinalih tunggil mawiwit kulawarga tunggal sanggah utawi merajan paibon lan dadia utawi nganbilin anak tios sakewanten sane maagama Hindu.
- (3) Kengin ngangkat sentana langkung ring adiri, lanang wiadin wadon.

Palet 4

Indik Warisan

Pawos 59

- (1) Warisan inggih punika tetamian arta berana saha ayah-ayahan ngupadi sukerta sekala niskala saking keluturannya arep ring turunannya.

- (2) Kang sinanggeh warisan luire :
- ha. Duwe tengah tegal ayahan desa, kahyangan, siwa karana, lan sane siosan;
 - na. Pagunakayan tadtadan utawi jiwa dana, hutang piutang.
- (3) Wawu kengin kebaos warisan prade wenten :
- ha. Sang mapiturun (pawaris);
 - na. Katurunan (ahli waris)
 - ca. Artha brana utawi tetegenan-teteganan (ayah-ayah) makecihna warisan.

Pawos 60

- (1) Ahli waris, Luire :
- ha. Prati sentana purusa;
 - na. Prati sentana (sentana rajeg)
 - ca. Sentana paperasan (lanang utawi wadon)
- (2) Prade tan wenten sekadi ring ajeng, kang sinanggeh ahli waris :
- ha. Turunan purusa pernah ngunggahang, rerama lanang, pekak, selanturipun rerame miwah mindon;
 - na. Turunan purusa pernah ke samping mekadi kaponakan miwah mindon.

Pawos 61

Swadarmaning ahli waris patut :

- ha. Nerima saha nguwasayang tetamian pahan kaluhurannia, mekadi ngempon sanggah, pura saha meupakarannia nyelidihin ayah-ayahan pawaris;
- na. Ngabenang pawaris saha ngelanturang upacara-upacara pitra;
- ca. Nawurin hutang-hutang pawaris sane manut pangelokika.

Pawos 62

Pengepahan waris nganut sekadi ring sor:

- ha. Risampun kalaksanayang pitra yadnya lan utang-utang pawaris buntas katawur.
- na. Para ahli waris polih pahan manut dresta (sang lanang polih ategen san istri polih asuhun), tegal ayahan desa kaemong antuk ahli waris kang sinanggeh krama ngarep utawi batan paha.

- ca. Sinalih tunggal ahli waris kengin tan polih pahan prade :
1. Nilar kawitan lan sesananing apama,
 2. Alpaka guru rupaka,
 3. Sentana taler kesah mawiwaha utawi pratiscantana nyeburin soang-soang kabaos ninggal kedaton.
- ra. Boya ahli waris, kengin muponi hasil manut dudonan, luire:
1. Sentana luh, selami durung kesah mawiwaha utawi alpaka guru miwah prade madrebe pianak tan keangkenin antuk wong tua rare inucap, kengin ngewaris wantah pikolih (pegunakayan) sentana luh inucap kemawon;
 2. Balu luh wiadin muani nyeburin (soang-soang boya sentana)
 3. Mulih deha utawi teruna riantukan ring pawiwahanne pecak sampun ninggal kedaton.
- ka. Pawaris kengin maweweh rikala maurip pinaka jiwa dana tatadan/bekel, maka cihna paweweh tetep ring pianak sane kesah mawiwaha.

Pawos 63

- (1) Prade sajeroning pakulawargan wenten ahli waris langkungan ring adiri patut;
 - ha. Kawntenang paigum indik pedum waris inucap;
 - na. Yan tan prasida katunasang tatimbang ring Prajuru (kerta desa);
 - ca. Prade taler tan wenten cumpu ring panepas kerta Desa, kengin katunasang ring Sang Rumawos (Pengadilan Negeri)
- (2) Prade karang inucap keputungan, patut Prajuru utawi Dulu-Dulu nibakang ring :
 - ha. Sang sinanggeh ahli waris manut pawos 60;
 - na. Sang kengin anggen sentana anut pawos 58 (2) miwah (3);
 - ca. Prade taler tan wenten cumpu ring panepas kerta Desa, kengin katunasang ring sang Rumawos (Pengadilan Negeri)
- (4) Prade jantos karang desa kepah utawi kasepih, patut soang-soang nedunin makrama desa ngarep utawi batan paha.

SARGA VI
WICARA LAN PAMIDANDA

Palét 1

Indik Wicara

Pawos 64

- (1) Sane wenang mawosin makadi mutusang wicara ring desa inggih punika Prajuru utawi Dulun Desa sinanggeh kerta desa.
- (2) Prade sang mawicara tan cumpu ring pamutus Kerta desa, kengin nunasang wicara inucap ring sang rumawos (Pengadilan Negeri)

Pawos 65

- (1) Sahanan wicara mawiwit kecorahan saka luire sinanggeh nungkasin daging Awig-awig pasuara pararem Desa utawi Banjar, Prajuru utawi Dulu patut digelis mawosin.
- (2) Sejaba wicara sekadi ring ajeng patut nyantosang pesadok sang nunas bawos
- (3) Panepase patut pastika nyatenang iwang patut melarapan Tri Premana (saksi, lekita, bukti) miwah tan maren nepek ring Catur Desa Dresta.

Palet 2

Indik Pamidanda

Pawos 66

- (1) Desa utawi banjar wenang niwakang pamidanda ring warga desa sane sisip.
- (2) Paniwak inucap kalaksanayang olih bandesa utawi Klian Banjar.
- (3) Bacakan pamidanda luire :
 - ha. Ayahana panukun kesisipan;
 - na. Danda arta (danda saha panikel-panikelnya urunan);
 - ca. Rarampagan ;
 - ra. Kasepekan ;
 - ka. Penyanggaskara.
- (4) Pamidanda sane katiwakang patut masor singgih manut ring kesisipane.
- (5) Jinah utawi raja brana pamidanda ngeranjing dados druwe Desa utawi Banjar.

Pawos 67

- (1) Krama sane langkung ring tigang paruman ngelantur tan nawur urunan miwah dadendan wenang karampag;
- (2) Karampagan nganggé tata cara kadi ring sor :
 - ha. Kalaksanayang antuk prajuru kasarengin antuk Krama sekiranya tigang diri maka sakti;
 - na. Sang ngerampag saking darasana ngambil barang utawi nyawenin tanem tuwuh, akelnya manut ring hutang sang karampag;
 - ca. Prajuru utawi Dulu miteketang mangda barang-barang sane karampag digelis katebus, masengker awuku ring kutus rahina pacang kaadol.
 - ka. Tan nganinin saluwir barang-barang sane kerampag patut inggilang manut Agama miwah mademang pangupa jiwa sang kerampag;

Pawos 68

- (1) Prade sang pacang karampag ngewara utawi ngalangin pelaksanayang inucap mawastu sampun tan nganutin awig-awig desa, wenang gedongang.
- (2) Pamidanda inucap ring ajeng keni buntas risampun sang kekeninin :
 - ha. Nunas geng pengampura ring krama desa riantukan nguwak pasubaya (pararem) pecak;
 - na. Nawur pangargan panguwak pasubayane duk pacang karampag kadulurin parayascita penyapsap keiwanganne ring Desa.

SARGA VII

NGUWAH-NGUWUHIN AWIG-AWIG

Pawos 69

- (1) Nguwah-nguwuhin Awig-awig Desa puniki kalaksanyang antuk paruman Desa
- (2) Awig-awig puniki kamargiang ngawit kaingkupin (kararemin).

Pawos 70

- (1) Sakaluring sane wenten saderengnya patut kaanutang ring sadaging Awig-awig puniki
- (2) Sakaluring sane durung kebawos sejeroning Awig-awig patut ngelaksanyang manut tata cara sane sampun mamargi kadulurin antuk pararem-pararem.

SARGA VIII

PEMUPUT

Pawos 71


- (1) Awig-awig puniki kararemin duk raine redite pon medangsia, pinanggal kalih Agustus warsa 2015, ring Pura Baleagung Desa Pekraman Kawan
- (2) Awig-awig puniki kalingga tanganin antuk Bendesa kesarengin Klian-klian Banjar saha kesaksinin antuk kelian-kelian dinas utawi Kepala Lingkungan miwah sewewidangan Desa Kawan miwah Kepala Kelurahan.
- (3) Luir sang ngalingga tanganin:


ha. Kapertama Prajuru utawi Dulun Desa:


1) Bendesa Adat Pekraman Kawan


2) 
Gede Kastawan

3) 
Klian Banjar Adat Blungbang
Drs. I Wawan Jiwa

4) Klian Banjar Adat Pule

Made Sukadana, S.Pd.

5) Klian Banjar Adat Geriya

Drs. I Wawan Jiwa


6) Klian Banjar Adat Nyalian

Kart Satriawati, Am.Pd

7) Klian Banjar Adat Puri Kanginan

A.A. Gde Arta Nindra


8) Klian Banjar Adat Puri

Dencarik


A.A. Gde Kawiarta



na. Kaping kalih Prajuru Dinas utawi Kepala Lingkungan maka Saksi :

1) Kepala Lingkungan Br. Kawan





Wawan Sadu


2) Kepala Lingkungan Br.



Nengah Suarna



3) Kepala Lingkungan Br. Pule



Nyoman Maret Adnyana


4) Kepala Lingkungan Br. Geriya


I Nengah Darma



5) Kepala Lingkungan Br. Nyalian



Nengah Mulhawan

6) Kepala Lingkungan Br. Puri
Kanginan



A.A. Gde Oka Sastrawan

7) Kepala Lingkungan Br. Puri



Dencarik

A.A. Susda Antara, S.E.

ca. Kaping tiga Lurah lan Camat

1) Lurah Kawan



I Made Dina Sulys Udiana, SSTP, M.AP



Wayan Wardana

ra. Bupati Bangli maka inurdha pamikukuh

Mengetahui dan telah dicatatkan :

Tanggal : 3 Agustus 2015

Reg. Nomor : 3/2015/HK

Bupati Bangli

I Made Gianyar, S.H., M.Hum.

DESA PEKRAMAN KAWAN
KECAMATAN BANGLI
KABUPATEN BANGLI

BENDESA PEKRAMAN KAWAN

KEPUTUSAN BENDESA PEKRAMAN KAWAN
NOMOR : 04/DPK/2015

TENTANG

PEMBENTUKAN PANITIA PENYURATAN AWIG-AWIG
DESA PEKRAMAN KAWAN TAHUN 2015

- Menimbang a. bahwa untuk kelancaran pelaksanaan penyuratan awig-awig Desa Pekraman Kawan dipandang perlu untuk membentuk panitia Penyuratan Awig-awig di Desa Pekraman Kawan.
- Mengingat 1. Peraturan Daerah Provinsi Bali Nomor : 03 Tahun 2003 tentang perubahan atas Peraturan Daerah Provinsi Bali Nomor : 3 Tahun 2001 tentang Desa Pekraman ;
2. Keputusan rapat Prajuru se- Desa Pekraman Kawan pada hari Redite Wage, 25 Januari 2015 tentang Pembentukan Panitia Penyuratan Awig-awig.

MEMUTUSKAN

MENETAPKAN: KEPUTUSAN BENDESA PEKRAMAN KAWAN PEMBENTUKAN PANITIA PENYURATAN AWIG-AWIG DESA PEKRAMAN KAWAN TAHUN 2015.

PERTAMA Membentuk Panitia Penyuratan Awig-awig Tahun 2015 dengan susunan sebagai berikut :

- | | | | |
|-------|--------------------------|---|--|
| I. | Penanggung jawab | : | Sang Gede Kastawan |
| II. | Pengabih | : | Dulu Adat lan Kepala Lingkungan se-
Desa Pekraman Kawan |
| III. | Ketua | : | I Wayan Wira, S.H. |
| IV. | Wakil Ketua | : | I Dewa Gde Maharta |
| V. | Sekretaris | : | Ir. I Wayan Budi Warnama |
| VI. | Wakil Sekretaris | : | A.A. Made Oka |
| VII. | Bendahara | : | Cokorda Gde Agung Rahna Putra, S.H. |
| VIII. | Wakil Bendahara | : | A.A. Gde Arcana |
| IX. | Seksi - seksi | : | |
| | a. Seksi Baga Parhyangan | : | |
| | Koordinator | : | Gst. Ngurah Ariadnyana (Br. Kawan) |
| | Wakil Koordinator | : | Mangku Dangin (Br. Pule) |
| | Anggota | : | 1. Made Darma, M. P. (Br. Pule)
2. I Wy. Arsa (Br. Blungbang)
3. I Nym. Suyasa (Br. Blungbang)
4. Jro Mangku Rajapati (Br. Nyalian)
5. Jro Mangku Kariasa (Br. Nyalian)
6. A. A. Raka Sudirga (Pr. Dencarik)
7. A. A. Anom Gautama (Pr. Dencarik)
8. A.A. Gd Suratna Kanya (Pr.
Kanginan)
9. A.A. Gd Oka Sastrawan (Pr. |

10. I Dw. Gede Raka Banjar (Br. Kawan)
11. I. B. Made Puja (Br. Griya)
12. Kt. Mk. Sutawiguna (Br. Griya)

- b. Seksi Baga Pawongan :
- Koordinator : I Nym. Jeben Windra (Br. Pule)
 - Wakil Koordinator : I Wy. Sumerta (Br. Nyalian)
 - Anggota :
 1. Wy. Sudira (Br. Pule)
 2. I Wy. Kaler Sudira BSc. (Br. Kawan)
 3. I Nyoman Suara (Br. Kawan)
 4. Sang Pt. Sujendra (Br. Griya)
 5. I Wy. Tantrayasa (Br. Griya)
 6. A.A. Gede Arthanendra (Pr. Kanginan)
 7. A.A. Gede Adiputra (Pr. Kanginan)
 8. A.A. Anom Puspawan (Pr. Dencarik)
 9. A.A. Adi Semara (Pr. Dencarik)
 10. Gurun Rumiasih (Br. Nyalian)
 11. Kt. Anom Artha (Br. Blungbang)
 12. I Dewa Alit Mas (Br. Blungbang)


- c. Seksi Baga Palemahan :
- Koordinator : Ngh. Suartana (Br. Blungbang)
 - Wakil Koordinator : I Wy. Budi Darma (Br. Griya)
 - Anggota :
 1. Made Sukarma (Br. Pule)
 2. Wy. Mariada (Br. Pule)
 3. Wy. Suarna (Br. Kawan)
 4. I Wy. Sukarta Sangging (Br. Kawan)
 5. Nym. Serinu (Br. Nyalian)
 6. Cok. Alit Caturyasa (Br. Nyalian)
 7. A.A. Gede Ari Kurniawan (Pr. Kanginan)
 8. A.A. Gede Ardanata (Pr. Kanginan)
 9. A.A. Anom Sudira (Pr. Dencarik)
 10. A.A. Bagus Sandi Putra (Pr. Dencarik)
 11. I Ngh. Witarsa (Br. Blungbang)
 12. I Ngh. Wiadnyana (Br. Griya)

KEDUA : Panitia sebagaimana dimaksud dalam diktum KESATU mempunyai tugas merencanakan, melaksanakan, dan menyukseskan Penyusunan Awig-awig Desa Pekraman Kawan tahun 2015.

KETIGA : Segala biaya yang timbul sebagai akibat ditetapkan keputusan ini dibebankan pada Bantuan Dana Hibah untuk Desa Pekraman Kawan tahun 2015.

KEEMPAT : Keputusan ini mulai berlaku pada tanggal ditetapkan.

Ditetapkan di : Bangli
 Pada tanggal : 26 Januari 2015


 RA BENDESA PEKRAMAN KAWAN
 KECAMATAN BANGLI
 KABUPATEN BANGLI
 SANG GEDE KASTAWAN